


1.775


BIBLIOTEKA


Zakł. Nar. im. Ossolińskich


XVII

2534









DE

LIBERALITATE ET AVARITIA

BREVIS DISSERTATIO.

AVCTORE

IOANNE BUKOWIECKI
à Bukowiec.



CRACOVIAE,


In Officina Typographica Francisci Cæsarij,
Anno Dñi, 1627.

1.775



XVII - 2534 - III

GRACOVIA
In Officina Typographica Francisci Gajdosi
Anno Domini 1827



Beneuolo Lectori S.

CUm aliquando in familiari amicorum quorundam congressu, quibus & ego aderam, inter varios sermones quales amici, & viri boni miscere solent, mentio facta esset auaritie, quesitūq; de vitij istius natura, ut, cum religio Christiana vitium hoc tantopere excretur, ac damnet, sciri possit quibusnam cancellis ac limitibus circumscribi debeat, ne vel auaritia specie cuiusdam frugalitatis alicui illudat, vel frugalitas auaritie laruam induat: cum inquam hæc disceptarentur, dixi tum & ego sententiam hac de re meam, & ut tantò rectius auaritie naturam explicarem, à liberalitatis explicatione exorsus sum. Quæ cum illis non displicuissent, & presertim illi qui inter ceteros & etate & dignitate eminebat, petiit à me ut ea quæ dixissem, literis suâ causâ consignare vellem. Parui non inuitus æqua petenti. Neq; enim quæ recta esse, & ad morum honestatem spectare putamus, cum amicis communia facere grauari debemus. Hæc cum à me ipsius causâ cōsignata & ab ipso lecta ac relecta essent, nunquam me urgere destitit, ut ea typis euulgari permitterem. Re-

LECTORI

pugnaui diu multumq̃, quòd eum me esse non crederem, qui in publicum orbis theatrum prodire possem. Verùm cum is nō inutile fore putaret hæc edi, hac præsertim tempestate, in qua viri etiam alioquin non mali avaritiæ isto morbo tententur, opibusq̃ cumulandis plus quàm Christianis conueniat sint addictiores: eò me tandem passus sum adduci. Tu benigne Lector, quicquid istud laboris est, boni consule, & siue pauper es, siue diues, siue priuatam agis vitam, siue publicam rem tractas, siue in parua, siue in magna dignitate es positus, secundam vitiorum avaritiam fuge,

Virg.

Quid (enim) non mortalia pectora cogis

Auri sacra fames?

Idq̃ tibi persuade, te hoc monstro debellato, & hac hydra prostrata, multorū vitiorū capita recisurū esse.

Horat.

Non es auarus? abi quid cætera? iam simul isto

Cum vitio fugere.

Faxit Deus, ut homines Christiani tandem aliquando intelligant, quàm turpe & indecorum, quàmq̃ perniciosum sit iis qui ad celestis regni fastigium, & immensas illas æternasq̃ diuitias diuina benignitate sunt vocati, terrenis istis certo citòq̃ perituris opibus inhiare. Vale. Anno à Christo nato M. DC. XXVII.

LIBE-

LIBERALITATIS ET
AVARITIÆ BREVIS
descriptio.



QVVM VITIORVM TURPITVDO, maximè detegatur pulchritudine virtutum, & vicissim virtutum pulchritudinem vitiorum illustret turpitudo: idcirco avaritiam, liberalitatis veluti opposita imagine, in hac tabella spectandam proponam. Et de liberalitate quidem primum ac potissimum instituendus est sermo. Hac enim cognita, & suis circumscriptâ limitibus, in suoque (ut sic dicam) regno constitutâ, facile quid extra limites euagetur & erret, quid vicissim arctetur & constringatur angustia, cognosci poterit. Itaque cum omnis virtus certo quodam modo circa suam propriam materiam (quæ in scholis obiectum vocatur) versetur; liberalitatis; & materia pariter & circa illam versandi ratio, determinanda est. Materia sunt nummi, seu id omne quod pecuniâ & nummis aestimari solet. Liberalitatem enim & beneficentiam hoc loco non extendimus ad alia etiam officia, quæ præter sumptum & impensam, operâ, auxilio, consilio, aut quavis alia ratione alteri præstantur: cum ista nunc explicare ad institutum nostrum non pertineat. Tota autem circa pecuniam versandi ratio, dando, accipiendo, retinendo, concluditur. Quocirca liberalitas erit virtus, quæ rectum ac conuenientem modum in istis omnibus retinet, ac seruat. Primarium quidem liberalitatis officium est circa dandam ac distribuendam pecuniam rectè & conuenienter

De liberalitate & auaritia

versari, verumtamen ad accipiendam quoque ac retinendam se porrigit, cum nec fundum habeat ipsa per se largitio, nec vitiosam acceptionem honesta consequatur datio. Quare explicanda liberalitate, rerum potius ordinem, quam liberalitatis rationem naturamque secuti, primò de quærenda seu accipienda pecunia agemus, tum de retinenda, tandem de danda. Quod igitur ad quærendam pecuniam attinet, ante omnia excindenda est ex animo pecuniæ aviditas quædam ac fames, quæ ubi animum inuasit nihil moderatum, nihil temperatum suadet, ut in his videmus quos fames vel sitis acerrimis urget stimulis. Quin potius eâ animi moderatione pecunia quærenda est, ut diues fieri, opibusque congestis incubare nec cupias nec cogites. Nam, ut Sacra nos docet pagina, *qui ditescere volunt incidunt in tentationem & in laqueum, inque multas & insanas ac perniciosas cupiditates, quæ homines in perniciem interitumque demergunt. Radix enim omnium malorum est amor pecuniæ.* Ab omni deinde iniustitia & iniuria abstinendum, & diligens adhibenda cautio ne quidpiam alieni nobis adhærescat. Quemadmodum enim aquilarum pennæ, aliarum avium plumas occulta quadam vi consumere dicuntur: sic iniuriâ partæ opes reliquas omnes, iusto licet labore quæsitæ dissipant. Ab omni etiam turpi ac indecoro quæstu liberalis abhorret, quem magis honesta fama quam pecunia delectat. Cuius rei immemor fuisse videtur Vespasianus Imperator, qui ex publicis latrinis quas Romæ extruxerat, magnam pecuniæ vim corrasit. Huc pertinent omnes illi qui sese alienis voluptatibus ac cupiditatibus mancipant, & ad vilissima quæque ministeria abiiciunt lucri causa.

A petendo etiam quantum fieri potest cohibendus est animus. Non enim satis honestum videtur ambire aliquem precibus, vel precario quidpiam possidere, estque liberalis ad dandum quam ad accipiendum pronior. In contractibus etiam facilem se præbet, & tractabilem, nec ad vnguera refecat omnia, sed ut Comicus ille ait

Breuis dissertatio.

*Dat, prætermittit, non necesse habet omnia
Pro suo iure agere.*

Vnde fit vt à litibus abhorreat, quas qui amant semper inquieti sunt, ac turbidi, nec aliis tantùm sed & sibi ipsis molesti ac graues. In re quoque domestica ac familiari curanda, non acerbum & rigidum, sed placidum ac benignum familiæ se præbet & subiectis. In primis autem salutis suæ memor, huic curandæ totum se tradet, huic vacabit, huc omnes ingenij sui & industriæ neruos intendet, has opes non explenda fame sitique appetet, & tantum terrenis rebus vacabit quantum cælestium sollicitudo permittet. *Quarite primùm*, inquit Seruator, *regnum Dei & eius iustitiam, tum cætera omnia adiicientur vobis*. En quam liberale Seruatoris promissum! durè cælestia curamus, dum in iis acquirendis toti sumus, hæc terrena veluti ad cumulum tantæ felicitatis adiiciuntur: huius corporis ac vitæ nimiam curâ leuamur, vt toto pectore & studio nec interrupto, nec in plura distracto animæ salutem curemus.

His explicatis, secundo, vt ante constituimus, loco, de retinenda & asseruanda pecunia agamus, cùm in cassum pecunia quærat, si acquisita temerè & inconsultò dilabatur ac effluat; estq; pecuniæ retentio intermedio quodam loco sita inter quærendum & distribuendum, sic vt eam non iniuriâ loculos & marsupium quoddam liberalitatis appellare queas. Huc propriè pertinet vt quantum pecuniæ & facultatum liberali possidere ac retinere liceat, definiatur: quæ res ex duplici pecuniæ vsu clarè patet. Cùm enim pecuniam vel nostrâ vel aliorum causâ quæramus & possideamus, nostrâ causâ non amplius nobis possidere licebit, quàm quantum ad vitam honestè ac commodè pro cuiusvis statu ac conditione transigendam sufficit. Nam, vt ille ait, *primus est diuitiarum gradus habere quod necesse est, secundus quod sat est*.

Aliorum

De liberalitate & auaritia

Aliorum verò causâ tantum pecuniæ ac facultatum retine-
re licebit, quantum liberalitas in oculis nostris relinquet, seu, vt
vtrumque pecuniæ finem complectamur, tantum nobis bono-
rum possidere licet, quantum vel ipsi requirimus, vel aliorum
indigentia à nobis non requirit. Quod igitur ad eam pecuniæ
partem attinet, quam nostrâ causâ seruamus ac retinemus, in ea
modus & mensura adhibenda est iusta. Istud enim veluti fun-
damentum liberalitatis subterni debet, vt paucis contenti si-
mus, non superfluas corporis voluptates, nec inanem vitæ fa-
stum & splendorem consectemur, sed naturæ & honestatis can-
cellis cupiditates nostras castigemus. Deinde animum ab omni
anxietate & trepida cura vacuum habere debemus, si quid no-
bis ad vitam in posterum sustentandam adhuc desit. A quo vi-
tio dehortatur nos ipse Seruator, qui nos Deo curæ esse affirmat,
& exemplo tum auicularum quæ sine vlla sollicitudine in cra-
stinum lætam agunt vitam, tum florum ac graminis, quod læ-
tissimo colore veluti amictu viret vernetque, diuinæ nos pro-
uidentiæ admonet. Dum verò nos ab omni animi anxietate ac
in futurum sollicitudine dehortatur Seruator, non dissolutos
nos esse vult, nec ignauos, aut incuriam vel inertiam nobis in-
stillat, sed eos qui cum paupertate strenuè luctantur, quique
manibus ac labore famem & inediam depellunt, non verò qui
incuria & otio torpent complicitisque pedibus, & palmulis in-
ter alternas digitorum vicissitudines super genua connexis ege-
statem vltro aduocant, prouidentia diuina solatur.

Ho-
rat.

Non ego auarum (vt Satyricus ille ait)

Cum veto te fieri, vappam iubeo ac nebulonem.

Nam qui opes temerè & inconsultò dilapidant, diuina abutun-
tur prouidentia, meritoque postmodum egestate poenas luunt.
An non enim ipsa rerum natura nos monet vt prouidi simus?
quæ non singulis diebus suas opes ac fruges profundit, sed anno-
rum

Breuis dissertatio.

rum spatiis & interuallis. Formicas imitari debemus non cicadas, de quibus elegans est apologus. Cū enim cicada quæ neq; de victu, neque de recto æstate sibi prospexerant, frigore pariter & esurie confectæ, à formicis peterent, vt in antrum ad formicarum granaria reciperentur; quæsiuisse ex iis formicæ dicuntur, quamam re & operâ totam æstatem contriuisent? cantando, referunt illæ: nunc ergo, subiiciunt vicissim istæ, si placet, saltando hyemem exigitæ. Quocirca adoleſcentia, ætatisque robur non somno & ignauiâ transmitti debet, sed in iuuentute senectuti paranda sunt præſidia. Nec enim semper erit ætas & vernantis ingenij viriumque vigor, ingrūet breui frigida & castæ senectutis hyems. *Qui suam colit humum* (vt Iudæorum sapientissimus pronunciat) *victu satiabitur, sed qui ignauos imitatur, satiabitur egestate.* Quemadmodum autem fortunæ præſidiis destituti, sic vicissim opibus affluentes omni animi metu ac perturbatione vacare debemus. Multi enim diuitiis magis cruciantur quàm egestate, dum eas anxia & irrequieta cura custodiunt, dum aduersus omnem fortunæ minitantis strepitum expallent, latiore longè vitam acturi, si muneribus istis fortunæ caruissent.

An vigilare metu ex animem noctesq; diesq;

Formidare malos fures, incendia, seruos.

Ne te compilent fugientes, hoc iuuat? horum

Semper ego optarim pauperrimus esse bonorum.

Horat.

Certè non minus arduum est diuitias quam paupertatem rectè ferre: Procul igitur à nobis absit eiusmodi misera; ac omni paupertate grauiores diuitiæ, certissimum auari & illiberalis animi indicium. Nam cū liberalis ex maximis etiam opibus nihil suum putet nisi quo indiget, quomodo earum iacturam nimis aut metuet aut dolebit? Nolumus autem quenquam adeo suis commodis adstrictum esse, vt vel antequam suis vſibus conuenientem pecuniæ modum assequatur, vel si vltra suos vſus non-

De liberalitate & auaritia

dum est progressus, nihil cuiquam benefaciendum putet. Nam qui animo liberali & benefico præditus est, vel de quotidiano victu partem potius decidet, & tenues licet ac pro suo modulo collectas facultates imminuet, quam ut opis indigum auxilio suo destuat, vel alijs necessarijs vsibus delit: estque hoc pulcherrimum liberalitatis genus, quod Seruator in illa paupere vidua, quæ obulum tantum in ararium ad sacros vsus coniecerat, valdè commendat. Præcipue verò ijs rebus parendum non est, quibus non statim sed postea demum sis vsurus, si præsens opem exposcat necessitas. Sarciri enim tempore damnum istud poterit, ac benignitatis occasionem neglexisse ingens iactura est.

Quod autem attinet ad eam pecuniam quæ in aliorum vsus cedere debet, dico esse illam omnem quæ nostris vsibus superest, cuius non Domini & possessores, ut sic dicam, nec tanquam depositi alieni custodes, sed oekonomi ac dispensatores esse debemus, exercendæ liberalitatis occasionibus intenti. Quæ cum sint innumeræ ac multiplices, in tanta præsertim liberalium virorum annonæ caritate, auarorum autem & luxu perditorum vberissimo prouentu: difficile est, imò ferdè impossibile, liberalem hominem, & in jugi beneficentia versantem ditescere. Vnde fit, ut fortunam homines cæcitate arguant, quod viris optimis præteritis, pessimis quibusq; diuitias donet: quod tamen non fortunæ nescio cuius cæcitate, sed tum virorum bonorum voluntate ac certo animi consilio, qui virtutis officiis multo magis quàm vilibus nummis delectantur: tum improborum cupiditate & auaritiâ euenit. Quod si fieri posset, ut vir beneficus Crasso aut M. Crasso ditior euaderet, id propitio numini imputandum esset. Utinam illi qui omnium maximè liberales sunt, omnium etiam sint ditissimi, & qui ditissimi sunt, liberalissimi. Inprimis autem cauendum nobis est, cum pecuniam quâ ipsi non indigemus exercendæ

libera-

Breuis dissertatio.

liberalitatis causâ colligimus ac seruamus, ne vana quædam virtutis species nobis illudat, & sub liberalitatis prætextu velificemus auaritiæ. Facile enim euenit, vt suppetente in aliorum vsus pecuniâ, vel eâ nos ipsos egere, nobis persuadeamus, vel tanquam nondum maturis exercendæ liberalitatis viribus, benefaciendi studium differamus, vel occasiones expectemus commodiores, vel deniq; alia aliqua ratione crescentis pecuniæ amor in viscera ac medullas nostras veneni instar molliter sese insinuet. Namque

Crescit amor nummi, quantum ipsa pecunia crescit.

Quocirca animus maximè obfirmandus est aduersus pecuniæ amorem, & eius loco summum benefaciendi desiderium & ardens inferenda cupiditas. Aliis benefacere hoc lucrum honestissimum, has diuitias opesq; pulcherrimas putet. Quemadmodum enim sedulus agricola decurrentis aquæ riuulum nactus, aggeres illi continuò obicit, vt aqua sine villo vsu & emolumento præterfluens, restagnet, & vel pisces alat ac contineat, vel molarum rotas aggere desiliens impellat, vel hortos & prata irriget, cui postmodum suos reddit cursus, vt ad alios quoq; eadem utilitas ac emolumentum perueniat: sic liberalis riuum aliquem prosperæ & aurum sibi voluentis fortunæ nactus, aggeres illi, vt sic dicam, modicos parsimoniâ ponit, vt in suos domesticos vsus veluti restagnet, quos postmodum liberalitate laxat & ad aliorum utilitates ac commoda fortunæ suæ riuum plenissimis ripis transmittit: non aggeres aggeribus accumulât, vt immensæ opulentiæ stagnum efficiat, & cunctas si posset omnium opes solus absorbeat.

Reliquum est vt de distribuenda pecunia agamus, qua in re præcipuum liberalitatis munus consistit. In dando ergo modum & mediocritatem tenere debet liberalis: mediocritas autem ista ex circumstantiarum recta obseruatione pender: quales sunt vt sciat cuius gratiâ, cui, quid, quantum, quomodo,

De liberalitate & auaritia

quando dandum ac largiendum sit. Itaq; liberalis non glori-
olam aliquam & laudem nec lucellum beneficiis captabit. Sa-
lia enim beneficia hamata sunt & parua jactura magnam mer-
cedem querunt. Sola honestate ducitur liberalis, virtutis con-
scientia contentus: aut si premium ac laudem expectat, non
expectat ab homine sed a DEO. Secundum est, vt sciat cui
dandum sit: qua in parte tria potissimum sunt spectanda: in-
digencia, mores, coniunctio. Ad indigentiam maximè di-
rigendus est oculus. Indigemus autem rebus vel necessariis vel
commodis: qui rebus necessariis egent, primò omnium suble-
uandi sunt. Non enim imitatur liberalis auaros, lucri cupidine
cacos, aut prodigos, peruerso rem aestimantes iudicio, qui in-
ditissimos quosq; plurima dona congerunt. Hanc præposte-
ram liberalitatem perstringit ipse Seruator, cum iubet vt pau-
peres & egeni, diuitum loco conuiujs adhibeantur. Tum enim
maximè beneficus animus elueet, cum in homines tenues & in-
opes beneficia conferuntur. Æquius autem est & iustius illos ju-
uare qui magis merentur, quam qui minus: si cæterarum re-
rum par sit ratio. Nam si minus dignus necessariis rebus desti-
tuatur, alter verò qui dignior est tantum commodis; illi po-
tius succurrendum est, si nequeas utrique. Coniunctionis autem
multi sunt modi: nam aliis naturâ coniungimur, aliis volun-
tate, aliis & natura & voluntate. Naturâ coniungimur patriæ,
parentibus, liberis, cognatis, imò omnibus hominibus. Volun-
tate coniungimur iis omnibus, cum quibus communia habemus
sacra & religionem, eisdem mores, eadem studia, idem mu-
nus & officium, eandem domum, urbem, ciuitatem ac Rem-
publicam. Naturâ pariter & voluntate coniungimur vxori, af-
finibus. Quanto igitur arctius cum aliquo connectimur, tantò
promptius illi succurrere debemus. Liberalitatis tamen laus
decusq; in beneficentia erga eos consistit quibus non tam turpe
est & ignominiosum non benefecisse, quam benefecisse pul-
chrum & laudabile.

Quid

Brevis dissertatio.

Quid quantumuè dandum sit, hoc partim ex indigentia & meritis, partim ex facultatum nostrarum mensura & modo, partim deniq; ex eo quid quisq; sine nobis consequi queat vel nequeat, æstimandum est. Id igitur dandum est quo quisq; indiget maximè: tantum autem dandum est quantum & res postulat, & facultates nostræ ferunt, non plus, non minus. Nam qui plus dat, liberalitatis suæ nervos incidit, & dat operam ne diu liberalis esse possit: in suos est etiam iniurius, quibus id adimittit quod eis naturæ lege debetur. Creditores quoq; suos, si quos habet, hac ratione defraudat: quod ab hominis liberalis moribus alienissimum est, qui de suo non de alieno largitur, quiq; vel penitus ab alieno ære abhorret, vel creditoribus suis accuratè satisfacit. Qui verò minus dat, quàm & possit & res postulet, parcus ac tenax est, & ad avaritiam gradum fecit. Illi deniq; plus est dandum qui sine nobis consequi potest minus. Ultimo loco aliquid de dandi modo dicendum est. Atq; id primò notandum est, ut animo prompto ac hilari beneficiamus. Multi enim sunt quibus tam suaue est pecuniam elargiri quàm in neruum rapi. Quisquis invito ac reluctante animo largiris in avaritiæ versaris insidiis. Dabis igitur etiam non rogatus, si de indigentia constet, quam sagaci benignitate veluti odorari debemus. Qui tormentum rogandi remittit, multiplicat munus suum: nec vlla res carius constat quàm quæ precibus emitur. Rogantis autem & æqua petentis præces abrumpe, ut illum graui pudoris onere soluas, quasi pudor non fuerit petere id quod facili negotio exoratum est. Quicquid autem promittis, cito præsta: tantum enim demis beneficio gratiæ quantum addis moræ. Sarius est spem præcidi, quàm trahi, & semel cadere, quàm semper pendere. Animi verò sincerum in dando affectum exporrecta frons exprimat, lingua beneficium eleuet: absit tamen omnis ambitio; multi enim dum beneficia sua nimium deprimunt, eo ipso extollunt. Memoria quoq;

De liberalitate & auaritia

eorum, qui benefaciunt fluxa sit & labilis, eorum autem quibus benefic fidelis & pertinax. Clām potius dandum est quam palam: quod etiam monet Seruator, cū sinistram nostram manum nescire vult id quod facit dextra. Imitandus est ille de quo Plutarchus alicubi, qui cū ad visitandum amicum pauperem & ægrotum venisset, ratus, eum, id quod res erat, non solum cum morbo sed etiam cum egestate conflictari, onustam argento crumenam secum attulit, quam secretò, veluti malè cubantis stratum correcturus, puluino supposuit. Pudorem enim non expressisse beneficio magnum & memorabile munus est. Solent autem magis ad liberalitatem animo propendere illi, quibus à parentibus res relictā fuit, quam qui proprio labore & industria opes quasauerunt: cū tamen contrā fieri deberet. Nam qui paupertatem aliquando sensit, nouit quā durum sit paupertatis onus, ac proinde expertæ calamitatis veluti stimulis ad inopes subleuandos excitari deberet.

Cū igitur liberalis sit is, qui rectum modum ac rationem qualem hactenus explicuimus, in quarenda, retinenda, elargiendaq; pecunia seruat; relinquitur vt illi laborent vicio, qui circa hæc nullo recto ordine ac modo versantur. Cum autem omnis virtus in medio sita sit, medio autem duo extrema opponantur, duo etiam vitia liberalitati aduersari necesse est, quorum vnum medium superat, alterum infra medium subsistit.

*Est (siquidem) modus in rebus , sunt certi deniq; fines
Quos ultra citraq; nequit consistere rectum .*

In danda pecunia , qua in re liberalitatis præcipuæ cernuntur partes, qui medium modumq; superat, prodigus est , qui infra eum subsistit auarus. In accipienda verò & retinenda pecunia contrario modo sese res habet, qui enim hac in parte medium supergreditur, auarus est ; qui verò defectu laborat , prodigus. Prodigum tamen potius quā auarum in eo quod nimium est
peccare

Brevis dissertatio.

peccare dicimus, quòd in dando, quàm in re præcipuas liberalitatis partes esse diximus modum superet, limitesq; transiliat: præsertim quòd etiam prodigi in accipienda pecunia nimij esse sæpe soleant, interdum quoq; in retinenda: adeò vt hæc duo vicia, tam diuersa, tam dissidentia, monstruosâ quadam ratione in quibusdam confusa videamus, & profusio quidem acuat auaritiam, auaritia alar profusionem. Itaq; cum vterq; & avarus & prodigus in accipienda quærendaq; pecunia modum superare possint, aliquando etiam in retinenda concurrant; indoles & ingenium avari erit pecuniam non solum vltra modum quærere, sed etiam vltra modum retinere, ac proinde cum dandum est officio de esse solere. Sunt tamen avari veluti gradibus quibusdam inter se distincti. Nam alii quidem ardentissima quadam nec vnquam explenda siti diuitias quærunt; his similes qui serpentum ictibus quos dipladas vocant, saucii, adeò siti æstuant, in imis medullis ardente veneno, vt ne epotis quidem fluminibus ardentes veneni flammæ restinguere queant: quin ipsi istis serpentibus similimi quos Lucanus describens.

In mediis (inquit) sitientes dipsades vndis.

Lucan.

Nam & isti cum opibus vndiq; circumfluant, semper sibi pauperes & egeni videntur. Istorum libidinem nullæ opes, nullæ facultates explere possunt: tantus est cupiditatis hiatus, tanta rabidi ventris ingluuies. Quibus merito illud obijci potest

— — dic quid referat intra

Natura fines viuenti, iugera centum an

Mille ares? At suauis est ex magno tollere aceruo:

Dum ex paruo nobis tantundem haurire relinquis

Cur tua plus cumenis laudes granaria nostris?

Millia frumenti tuatriuerit area centum

Non tuum hoc capiet venter plus quàm meum — —

Horat.

In formicis longè plus prudentiæ hac in parte est quam in istis hominibus à quibus laborem & industriam inertes; parsimo-

DIAP

De liberalitate & auaritia

nam dissoluti & futuri improuidi; quietem ac otium & quæ-
sitis opibus frui, auari discere deberent.

Ho-
rat.

*Paruula nam exemplo est magni formica laboris
Ore trahit quodcumq; potest, atq; addit aceruo
Quem struit haud ignara ac non incauta futuri.
Qua, simul inuersum contristat aquarius annum
Non vsquam prorepat, & illis utitur ante
Quæstus, patiens: cum te neq; seruidus æstus
Dimoueat lucro, neq; hyems, ignis, mare, ferrum,
Nil obstat tibi dum ne sis te ditior alter.*

Quocirca optimo iure Flaccus homines istos ad Medicos re-
legat:

*Si tibi (inquit) nulla sitim finiret copia lymphæ
Narrares medicus: quòd quanto plura parasti
Tanto plura cupis, nulline faterier audes?*

Horum insaniam Poetæ Danaïdum illa fabula notant, quas
ad hauriendam situlis percussis aquam Inferorum iudex perpetuam
seruitute damnauit. Huius gregis auari solent aliena vi &
fraude cum possunt rapere, & saepe ad inhonestos ac turpes
quæstus sese abicere, eorum autem qui fraude & dolo circum-
ueniunt alios, non postremi sunt fœneratores, qui de rebus cre-
ditis usuram cum damno & detrimento extorquent. Horum
pecunia quam mutuò dant, veneno videtur illita, quæ non vi-
tam, sed perniciem alteri afferat

Non missura cutem, nisi plena cruoris hirudo.

Alii autem sunt qui non quidem immensas diuitias sine fine
congerunt, nec cupiditatis isto ardore æstuant; in retinenda ta-
men pecunia & premenda nimii sunt, nempe dum id quo ipsi
non indigent, aliis cum opus est subleuandis non impendunt,
sed recondunt. Priores illos, quia in auaritiæ certamine palmam
cæteris præripiunt, auaros simpliciter nominamus: hos verò
tenaces, restrictos, parcos, nomine magis proprio designare
solemus.

Brevis dissertatio.

solemus. Vtriq; istorum duplicis rursus sunt generis. Nam vel in alios tantum, vel in seipsos etiam immittes sunt & iniurij. Illi sunt, qui modo possint, nihil sibi quod ad vitæ suauitatem & commoditatem pertinet, deesse patiuntur & victu & cultu corporis non indecori ac sordidi. Qui homines non prorsus sunt insanabiles: ex sui enim amore, facilius alios amare discere possunt. At verò qui seipsos omni odio prosequuntur, qui se fame macerant, & semel panis mucida frustra latranti ingerunt stomacho vappamq; & acetum bibunt, ac omni corporis voluptate abstinere, ne vel obulus decedat censui; quibus tandem machinis ad beneficentiam ac liberalitatem adducentur? quibus anticyris ipsorum insania curabitur?

— — — Auidienus

*Cui canis ex vero ductum cognomen adhaeret
Quinquennes oleas est, & sylvestria corna
Ac nisi mutatum parcat diffundere vinum &
Cuius odorem olei nequeas perferre, licebit
Ille repotia, natales, aliosvé dierum
Festos albatu celebret, cornu ipse bilibri
Caulibus instillat veteris non parca aceti.*

Ho-
rat.

Istis hominibus nemo quidquam peius imprecari potest, quàm vitam longam: atq; hi sunt quos Tantali ridet fabula:

*Tantalus à labris sitiens fugientia captat
Flumina. quid rides? mutato nomine de te
Fabula narratur --- --- ---
Vuidius quidam non longa est fabula diues
Ut metiretur nummos: ita sordidus ut se
Non unquam seruo melius vestiret, aduq;
Supremum tempus ne se penuria victus
Opprimeret metuebat, at hunc liberta securi
Diuisit medium --- --- ---*

Ho-
rat.

Qui homines cum seipsos tantoperè non amant, quid mirum est quòd omnium odiis laborent, & eorùm maximè quibus esse debebant charissimi.

C

Non

De liberalitate & auaritia.

*Non vxor saluum te vult, non filius, omnes
Vicini oderunt, noti pueri atq; puella.*

Vt non mirum sit sordidum istum Vuidium à liberta securi fuisse maectatum. In istos maximè quadrat nobile illud dicterium: *Auarotam de est quod habet, quàm quod non habet.* Eo autem quod polysides egere, monstrôsæ cuiusdam egestatis est. Suas enim opes tanquam alienas possidet, & sãrtas rectas prius quam de vfu earum vnquam cogitasset, ad succëssores, calcem extendens, transmittit,

Ho-
rat.

--- --- credidit ingens
*Pauperiem vitium, & cauit nil acrius, vt si
Forte minus locuples vno quadrante periret
Ipse videretur sibi nequior --- ---*

Vixit ergo semper pauperrimus, vt moreretur ditissimus. Iuvat hìc Opimii illius in magnis diuitiis pauperrimi meminisse, qui vitam suam (& sanè meritò) non tantitecit, vt eam octo asibus redemptam vellet, in quem festiuo poemate Flaccus vt solet, lusit.

Ho-
rat.

*Pauper (inquit) Opimius argenti positiintus & auri
Qui Veientanum festis potare diebus
Campana solitus trulla, vappamq; profectis:
Quondam lethargo grandi est oppressus, vt heres
Iam circum loculos & clauas, latus ouansq;
Curreret. Hunc medicus multum celer atq; fidelis
Excitat hoc pacto: mensam poni iubet, atq;
Effundi saccos nummorum, accedere plures
Ad numerandum: hominem sic erigit, addit & illud.
Ni tua custodis, auidius iam hoc auferet heres.
Men' viuo? vt viuas igitur vigila, hoc age, quid vis?
Deficient inopem vena te nũcibus atq;
Ingens accedat stomacho futura ruenti.
Tu cessas, agendum, sume hoc ptisanarium oryza.
Quanti empta? paruo, quanti ergo? octo asibus. Eheu
Quid refert morbo an furto pereamne rapinus?*

Auari.

Brenis dissertatio.

Auaritia autem senum plerumq; morbus est, qui infirmitatis suæ conscii, & incertâ casuum pertimescentes, præsidium collocant in pecunia, quantoq; minus viæ restat, tantò plus viatici quarunt. Concludamus igitur, avarum esse, quicumq; in quaerenda & retinenda pecunia conuenientem modum transgreditur. Transgreditur autem is, qui vltra suos suorumq; vsus quibus vita liberalis & honesta continetur, id sibi seruat ac retinet quod aliorum hominum vsus est flagitant. Quem enim in finem superflua accumulatur & asseruantur opes? Ipse non vteris, imò nec abuteris, neq; tamen in opem & indigum cum opus est subleuas. Morbo igitur animi laboras & stulto pecuniæ amore caprus es.

Si quis emat cytharas, emptas comportet in vnum

Nec studio cythara, nec Musa deditus ulli:

Si scalptra & formas non sutor: nautica vela

Auersus mercaturis; delirus & amens

Vndiq; dicatur meritò: quid discrepat istis

Qui nummos aurumq; recondit, nescius vti

Compositis, metuensq; velut contingere sacrum?

Quid enim in pecunia ac opibus præter vsum laudabile? Vtere igitur, aut si non indiges; vtantur tua benignitate alij.

Si quis ad ingentem frumenti semper aceruum

Porrectus vigilet cum longo fuste: neq; illinc

Audeat Dominus esuriens contingere granum;

Ac potius foliis parcus vescatur amarus:

Si possit intus Chii veterisq; Falerni

Mille cadis, (nihil est tercentum millibus) acre

Potet acetum: age si & stramenti incubet vnde

Octoginta annos natus, cui stragula vestis

Blattarum ac tinearum epula, putrescat in arca:

Nimirum insanus paucus videatur, eò quòd.

Maxima pars hominum morbo iactatur eodem.

Nempe sunt auari canibus in foeno aut stramine cubantibus non ablimiles

Ho-
rat.

Ho-
rat.

De liberalitate & auaritia

abſimiles, qui cū ipſi iſtis non veſcantur pecudes ijs veſci vo-
lentes latratibus arcent, & morſibus impetunt. Multi ſunt qui
liberorum amorem obtendunt, quibus amplum patrimonium
& latifundia relinquere curant. At ingens eſt & opima hæredi-
tas, animus virtutibus diues. Quid huic deerit, qui tantas opes
poſſidet? Haſ tu non liberis ſed in liberis relinque. Quas ſi ſuf-
ficere non putas, licebit illis modicas relinquere facultates,
quibus rectè educatus animus contentus eſt. An tu liberorum
tuorum villicū ages, imò mancipium, imò jumentum quod
in Domini uſus comparatur pecuniā? Quàm multi ſunt paren-
tes qui ut liberos in re lauta relinquant, non tantū vitam hanc
omnemq; vitæ tranquillitatem & ſuauitatem, ſed etiam ſempi-
ternam ei rei ſalutem impendunt? Et tamen quis fructus in li-
beris iſtarum opum, tot curis, tot laboribus, & irrequieta ſolli-
citudine comparatarum? Pater fame, ſiti, ſquallore, volens pe-
riit, at hæredis quæ facta? quis animus?

Ho-
rat.

*Effundit hares Cacuba dignior
Seruata centum clauibus & mero
Tingit pauimenta ſuperbum
Pontificum potiore cœnâ,*

O ingentem parentum ſtultitiā! non quàm bonos relin-
quant liberos curant, ſed quàm diuites; neq; vident cū liberis
nullā virtutum culturā ſubactis opes relinquunt, instrumenta
nequitiae ſe illiſtradere: Vnde fit ut tot annorum parſimoniam
vnus dies, vnū conuiuium, vna meretrix ſape abſumat, &
tandem deſit egenti, ac laquei pretium. Hoccine erat cur pater
tot annos eſuriret? Quam inſaniam Satyrico ſale & aceto defri-
cuerunt complures:

Ho-
rat.

*Filius aut etiam libertus, ut ebibat hares
Diis inimice ſenex cuſtodus? --- ---*

Perſe,

*Ut tuus iſte nepos olim ſatur anſeris extis
Patriciae &c. &c. --- ---*

--- --- --- *mihī trama figura*

Brevis dissertatio.

Sit reliqua, ast illi tremat omento popa venter.

Quantò rectius ille qui dicit:

Vitar, & ex modico quantum res poscet, acerub

Tollam, nec metuam quid de me iudicet hares

Quòd non plura datis inuenerit: & tamen idem

Scire volam quantum simplex hilarisq; nepoti

Discrepet, & quantum discordet parcus auaro.

Distat enim spargas tua prodigum, an neq; sumptum

Inuitus facias, neq; plura parare labores.

Sunt alii qui sordes suas virtutem ac parsimoniam vocant, & dum pecuniæ magis quàm sibi parant, paruo se contentos viuere dicunt.

Horatius,

--- --- --- *Netibi desit?*

Quantulum enim summa curtabit quisq; dierum

Vngere si caules oleo meliore, caputq;

Cæperis impexâ sædum porrigine? --- ---

At, quare

Siquidvis satis est, periuras, surripis, aufers

Vndiq;?

Cur eget indignus quisquam te diuite?

Horatius,

Frustra igitur vicio nomen virtutis obtendis, & sordes pro parsimonia venditas. Detrahunt tibi laruam facta tua, & auariciam tuam redarguunt. Plurimi etiam idè diuitias opesq; sine fine querunt, quòd iis omnia consequi se posse putent.

Bona pars hominum decepta cupidine falso

Nil satis est, inquit, quia tanti quantum habeas sis.

Horatius,

--- --- --- *Omnis enim res*

Virtus, fama, decus, diuina humanaq; pulchris

Diuitiis parent: quas qui construxerit, ille

Clarus erit, fortis, iustus: sapiensne? etiam, & rex

Et quicquid volet.

Errant qui sic sentiunt: non enim ipsis diuitiis, sed earum recto usu, homines laudem atq; decus consequuntur: Qui verò diuitiis vel abutuntur vel non vruntur, quid aliud sunt, quàm publicum

De liberalitate & auaritia

blicum opprobrium & vulgi fabula? Illud adhuc addere lubet, adeò rarum esse diuitem, qui auarus non sit, vt coruo rarior albo dici mereatur: Quotusquisq; enim diuitum est, qui diuitias suas non amet, non sollicitè custodiat, non assidue accumulet, qui omne id quod sibi superest publici iuris esse censeat, & cui non meritò occini queat

Hæ-
rat.

— — — *congestis undiq; saccis*
Indormis inhians, & tanquam parcere sacris
Cogeris, aut pictis tanquam gaudere tabellis,
Nescis quò valeat nummus, quem prabeat vsum?

Ditescere certè, sine auaritia vix cuiquam licet, cum nunquam benetaciendi, & illud quo ipsi non indigemus in aliorum vsus erogandi occasiones ac iustæ causæ desint. Et qui ditescit, plerumq; etiam id agit vt ditescat, hoc est ditescere omninò vult, diuitiasq; animo & consilio intendit: at vero ditescere velle, id cupere, id spectare vt opibus affluas, Scripturâ teste auaritia est, nec scriptura tantùm, sed etiam ratione. Nam qui id spectant, diuitias quàm rectum diuitiarum vsum, qui in beneficentia positus est, malunt. Hinc scriptura diuitem cum nominat, auarum intelligit. Hinc Seruator ipse adeò arduum esse pronunciat diuitem in regnum cœlorum ingredi, vt facilius sit camelum per foramen acus transire. Nempe quia diuitiis iuncta solet esse auaritia, & nescio quomodo diuitiæ, amorem sui animis eorum qui eas possident instillent, qui eos quotiescunq; imperauerit Christus ab eis diuelli non sinit. Diuus etiam Iacobus diuitibus imminentes denunciat clades, quarum horrore eiularè eos iubet. Istud autem propter auaritiam fieri, cum res ipsa tum sequens oratio, quâ summa eorum in congerendis & premendis opibus iniustitia, tenacitasq; coarguitur, demonstrat. Et tamen diuitias omnibus votis appetimus, omni studio quærimus, recondimus, cumulamus; quas qui cupiunt, nedum qui quæunt, auaritiæ damnantur, ac proinde regno cœlorum excluduntur: qui verò habent, quominus in regnum cœlorum ingredi possint, mirifi-

cē ma-

Brevis dissertatio.

cè impediuntur: quas Seruator in pauperum vſus profundere iuſſit cum quem, olim ad perfectionem vocauit. Crates ille Thebanus homo quondam diſtiſſimus, cùm ad philoſophandum Athenas pergeret, magnum auri pondus abiecit, nec putauit ſe ſimul poſſe & virtutes & diuitias poſſidere: Et Græcus olim Ariſtippus

ſeruos proiicere aurum

In media iuſſit Lybia, quia tardius irent

Propter onus ſegnes:

Nos ſuſſarcinati auro, Chriſtum pauperem & expeditum ſequi volumus, nec vocem eius audimus, quã pauperes quidem beatos, diuites autem miſeros pronunciat, & illis quidem regnum cœlorum deſtinat, hos verò iam abſtuliffe ſuum ſolacium teſtatur: Vt non immeritò, Diuus Iacobus dixerit, DEVM elegiſſe huius mundi pauperes, fide diuites, hæredesq; regni, quod ſuis promiſit amatoribus. In huius tam beati ac feliciſſimi regni ſocietatem, ſi cum pauperibus venire volunt aliquando diuites, admittant nunc viciffim & ipſi in ſuarum diuitiarum conſortionem pauperes. Neq; enim hæc quæ de diuitibus diximus, eo ſpectant, vt ipſas diuitias damnemus, quæ bonæ ſunt, ſi bonis viris conſingant, malæ ſi malis; ſed vt diuites commoneſciamus. Deſinant opes ſuas amare, quærere, premere, cumulare. Vbi enim ſunt opes, illic & animum eſſe neceſſe eſt; & qui opibus ſeruit, DEO ſeruire nequit. Vnde factum eſt, vt ipſe Seruator clariffima voce edixerit, ne congeramus in terris opes, ubi & tinea arugoq; corrumpit, & fures perfodiunt, ac furantur. Deſinant ab uſu ſuis diuitiis ad voluptates immoderatas, ad inanem vitæ ſplendorem, ad faſtum & ſuperbiam, ad aliorum contumeliã & contemptum: ſed potiùs, vt cum Diuo Iacobo loquamur, in humilitate ſua glorientur: alioquin herbarum in morem perituri. Vt enim (inquit idem Iacobus) exortus cum ardore ſol, herbam arefacit, eiſq; & flus decedit & decora facies interit: Sic diues in viſ ſuis (hoc eſt moribus) marceſcet.

Sic

Ho.
rat.

De liberalitate & auaritia brevis dissertatio.

Sic diuitias suas possideant, iisq; fruantur, vt paupertatem non inuiti ferre possint:

Ho-
rat,

Vni nimirum tibi recte semper erunt res?

O magnus posthac inimicis risus. Vt nam

Ad casus dubios fides sibi certius? hic qui

Pluribus assuerit mentem corpq; superbum?

An, qui contentus paruo, metuensq; futuri,


In pace, vt sapiens, aptarit idonea bello?

Atq; vt sciant diuites quales esse debeant, quid vitare quidne sequi, si regnum coelorum adipisci velint, audiant quid eos Gentium Magister monitos velit: *Ius*, inquit, *qui in hoc seculo diuites sunt, denuncia, ne superbian, neue spem habeant in incertis diuitiis, sed in viuente Deo, qui nobis omnia largè suppeditat ad fruitionem, vt benefaciant, vt rectè facti diuites sint, vt liberales sint, atq; largi, praeclarum sibi fundamentum in futurum congerentes, vt vitam assequantur sempiternam.* En diuitem verè Christianum, & diuitiis dignissimum. Ad hanc normam & regulam sese componant, suaq; facta exigant, quicumq; diuitiis suis ac opibus non in barathrum aeterni interitus tanquam pondere quodam deprimi

& praecipites agi volunt, sed iis veluti alis quibusdam in sublimem rapi, & in coelum ad sempiternas voluptates & gaudia euehi cupiunt ac delide-

rant.





2079

6249

10

